

von Wulf Wager

## Dr Wechselwähler



Tja, liebe Parteia, so ka 's komma. Des Domme isch, dass dr Wähler selbr über dia Köpf entscheidet, von dene er sich druf rom danza lassa will. Des hot dr Röttgen selber gsait. Wenn oiner so ovrblümt d' Wahrheit sait, no wird 'r halt net gwählt. Der isch so-wieso viel z' glatt. Sotte Politiker hend heut koi Chance meh. Deshalb hot en onser

Bunderangela eiskalt abserviert. Die Bürger lassat sich ohnehin nemme für domm vrkaufa ond mit hohlem Lettag-schwätz ohne Inhalt da Honig om's Maul schmiera. Gfrotg send wieder Typa, dia für ebbes standat. Kerle wie dr Wehner, dr Brandt, dr Schmidt ond dr Strauß. Dia hend sich au d' Kepf eigschloga, aber dene isch 's om ebbes ganga: om Werte, Ideale ond Idea. Heut goht's dene Politikr doch bloß no om d' Macht ond ihr Selbschtvrorgung. Deshab miassat se sich au net wondra, dass emmer wieder amol am linka oder rechta Rand vom Parteiaspektrom a nuie Partei auftaucht, die de Etablierte Stemma stentz. Des war bei de GRÜNE so, bei de REPs, bei de LINKE ond des isch jetzt so bei de Pirata. Dia wissat grad no net so, wo se standat, hend no wenig Inhalte außer dass jeder en Kombjudr, braucht mit dem er noch belieba Urheberrechte verletza derf, aber des ka jo no komma.

Zom Glück geit's da Wechselwähler. Der wechselt bei jeder Wahl d' Meinung. On weil des viele machat, wie jüngscht in NRW spricht mr do vo Wählerwanderong. I ben bei dr letschta Landtagswahl nachts extra aufgstanda ond han die Wählerwanderung - hört sich jo au a wie Krötawanderong - beobachta wella. Gseah an i aber nix.

Scheene Pfengschta - mög euch dr Hoilige Goischt erleuchta ;-)

Wulf Wager

Alle Kolumnen zum  
Nachlesen: [www.woascht.de](http://www.woascht.de)  
oder em Facebook em Wulf Wager Fanclub